

DISSE^{Q.} TIONIS,
DE

**P R A E S E N T I
R E I P U B L I C A E
L I T E R A R I A E
F L O R E ,**

PARS PRIOR,

QUAM,

SUFFRAG. AMPLISS. FAC. PHILOS. IN REG.

AD AURAM ACADEMIA,

MODERANTE

H E N R I C O H A S S E L ,

ELOQUENTIÆ PROFESS. REG. & ORD.

PUBLICÆ DISQUISITIONI SUBJICIT

STIPENDIARIUS REGIUS,

ANDREAS ABRAH. HAGELBECK,

W. G.

IN AUDITORIO MAJORI DIE XX. MARTII

ANNI MDCCCLIV.

H. A. M. S.

ABOÆ, Impressit Direct. & Typog. Reg. M. Due. Fin-
land. JACOB MERCKELL.

KONGL. MAJ:TS
TRO MAN,
GENERAL MAJOR och ÖFWERSTE FÖR UPLANDS
INFANTERIE REGEMENTE,
SAMT
RIDDARE och COMMENDEUR
AF KONGL. MAJ:TS SWERDS-ORDEN,
HÖGWÄLBORNE HERREN,
H E R R
BARON **FRIEDRICH**
S P A R R E,

NÅDIGE HERRE.

D E flora egenfärper; som Herr Generalen til
Fäderneslandets välfärd besitter, hafva län-
ge sedan uti Svea Inbyggares hiertan up-
rest sig den ährestod, som trotfar all förgiängelighet.
Hoga

Höga förtjenster, och osörtruten nit vid vicktiga
värf, hafva til Rikets algemena fägnad upbrackt
Herr Generalen, at bepryda et ibland de större
Heders rum, från hvilcket glantsen af Herr Gene-
ralens höga Person vidsträckt lyser, til Svänska Hjel-
tars eftersyn. Vetenskaperne, som uti Herr Gene-
ralen vörda sin Älskare och Skydsherre, upmana si-
na idkare til täflan, at ådaga lägga sin vördsam-
maste ärkänsla. Välgierningar emot de torftiga,
utmärcka Herr Generalens Nåd emot de ringare,
hvilka för sin del vördsamt bidraga, at af oför-
giängeliga blommor sammanfläta de billiga ähre-
krantlar, som skola bepryda et så stort namn för
sena efterverlden. Uti samma Nåd har min fram-
ledne Far under sin lifstid haft den lyckan at vara
innesluten, hvaraf äfven Herr Generalen täckts låta
en nådig strähle falla på min späda ålder, då Försy-
nen genom min Faders tidiga frånfälle behagat sät-
ta mig uti et värvnlöst tillstånd. Herr Generalens up-
muntran til at idka vetenskaper, och därjämte för-
klarade Nåd, at framdeles vilja täncka på min väl-
färd, voro min fägnad under et så hotande öde.
Altderföre, och i förtröstan uppå samma Nåd, un-
derstår jag mig, at i diupaste ödmiukhet för Herr
Generalens fötter nedläggga denna min första lärospän,
et ringa Academiskt arbete, om vetenskapernes til-
växt och flor i närvarande tider. Uptag detta, Nå-
dige Herre, med så hög ynnest och Nåd, som jag
det i vördnad och välmening upoffrar. Almackten
tildele Herr Generalen et rikt mått af all välsignel-

se, samt giöre Herr Generalens dagar många, och
uti all hög fällhet och önskelig välgång fornögde.
Med diupesta vördnad framhärdar

Högwälborne Herr Barons, General Majorens
Riddarens och Commendeurens

Allerödmukaflte tjeuare,
ANDREAS ABRAH. HAGELBECK.

VIR amplissime atque Celeberrime,

DN. HENRICE
HASSEL,

In Illustri Athenæo Aboënsi Eloqu. PROFESSOR Reg. &
Ord. Consistoriique ejusdem ADSESSOR gravissime,

NUTRITIE PROPENSISSIME

*A*etas est, si Tuorum in me beneficiorum multitudinem confidero, ab eo tempore repetens, quo me in Domum Tuam Nobilissimam exceptum gratulor, si dies numero, nondum biesnum. Tū nimurum, Nutritie Propensissime, sub hoc temporis intervallo, necessitati mee benigne succurristi, Tū mibi consiliis saluberrimis constanter adfueristi, meque exquisissime Tue eruditionis nectare sepiissime satiasisti, Tū mibi Pater, Paternam mei curam gessisti optimam, benignissimam. TE igitur, Nutritie Propensissime, qua filium decet reverentia prosequor, TE veneror, Tuorumque beneficiorum memoria penes me manebit sempiterna, grata, pia. Sinas humillime rango, basce pagellis, quas Tibi submissæ offera, reverentie debite signum esse quatecunque. Ut enim nec beneficiorum Tuorum amplitudinem, nec meam in TE pietatem explicare queat illus eloquentie apparatus, sit precor quilibet hujus opere lineola, devotissimi & gratissimi peccoris interpres. Tu vero Palladis Decus, vivas Reipublice Literarie, & Academie nostre vivas. Famille Tue Nobilissime vires delicium suavissimum, mihi perbenignos, inter omnigenæ felicitatis fructus, quos Tibi adprecor uberrimos, floreas quam diutissime

NOMINIS TUI CELEBERRIMI

Hamillimus Cultor.


HAGELBECK ANDREAS A. HAGELBECK.

Plurimum Reverendo atque Clarissimo VIRO,
Dn. JOHANNI TIMBERG,
Pastori Ecclesiae Skarstadiensis Meritissimo,
PATRI INDULGENTISSIMO.

Quotidie dum pie, uti decet, recordor Tuae, Pater Optime, erga me caritatis magnitudinem, nullius prosector rei savior occurrit memoria. In tenera mox atatula, ut gravissimos mihi dolores peperit prematura b. Parentia mors, ita animum tanto vulnere afflictum recreavit intensissimus ille amor, quem mihi adeo semper exhibuisti, inde ab illo tempore, quo Te Patre frui mihi contigit Optimo, Indulgentissimo, ut Parente orbatus, nihil preter non men amisisse mihi videar. Nam quoad longissime possum, in ultimam pueritiam memoriam respicere, omnem in salutem meam impendisti operam, studium omne, ut si curam a Genitore polliceri mihi potuerim parem, certe non majorem. In primis veneror, quod prima eruditio principia, vel ipse, plurimis licet curis distractus, sollicite suppeditasti, vel ab aliis curasti instillanda. Quamdiu praesens mihi fuisti, ore suavis, vultu hilarius atque benignus, vita moribusque exemplar, quovis die, & prope dixerim momento, optima virtutis ac diligentiae dedisti incitamenta; jam vero absens, Iussiis, admonitionibus, consiliis, imo sumitibus mibi subvenisti, adeo ut per sexennium, quod apud Camenias has Auroraas transegi nibil mibi deesse volueris, Tibi licet defuerint multa. Hac omnia pia mente considerans, praesentem occasionem tatus arripui, quæ gratissimum in Te animum qualitercumque significarem. Recipias igitur, Pater indulgentissime, consuela Tibi benignitate, & affectu, ut soles, paterno, levissimas hasce pagellas, quas in tessera ad perpetua pietatis, qua filio par est reverentia, Tibi consecratum eo. Vivis, Pater Optime, omni felicitatis flore cumulatus ad ultimos usque vite humanae terminos, ut quam diutissime habeam in Te fulcrum & solarium certissimum exoptatissimum!

PATRIS INDULGENTISSIMI

Obedientissimus filius,
ANDREAS A. HAGELBECK,



S. I.



Uum Tuo L. B. favore freti, de
præsenti reipublicæ literaria flore a-
gere constitutus, priusquam ad insti-
tutū accedimus, quædā de fatis rei
literariae strictim præmittere visum
est, ut status hodiernus cum præteri-
to collatus eo clarius eluceat. De
eruditione antediluvia, deficientibus, quæ indolem
ejus illustrare possent monumentis, nihil habemus di-
cere. Eandem ob causam nec definiendum suscipimus,
quo primum tempore post diluvium cœperit artium in-
genuarum gnavor cultura; prout nec nostram faci-
mus controversiam, Chaldæis ne an Ægyptiis princeps
tantæ rei gloria debeatur: id autem asserimus, inde ab
antiquissimis temporibus, in oriente, & quidem apud
Chaldæos, Persas, Indos, Phœnices, quibus addi-
mus Ægyptios, varias excultas tuisse scientias. Patet
hoc ex cultu vitæ, hos apud populos eximio, & plu-
rimum, quæ eidem promovendo inserviunt artium ex-
cellentia, quæ quomodo sine cultu scientiarum exi-
stere potuerint, ne percipi quidem potest. Hoc insu-

per confirmat Græcorum orientalibus licet infensissimo-
rum confessio. Scientiæ, quibus operam dabant, erant
præsertim Geometria, Arithmeticæ, Chemia, Physica,
Astronomia & Medicina, imo Metaphysica. Hisce acce-
dit Historia, Doctrina moralis & Politica, sine quarum
disciplinarum fulcris tanta imperia tamdiu consistere
& florere non potuissent. Quid in singulis hisce arti-
bus præstiterint, explicare arduum est, imo impossibili-
le. Nulla enim hic suppetunt monumenta literarum,
ab ipsis Orientalibus consignata; quæ autem de illis re-
ferunt Græci, pauca sunt, & suspectæ plerumque fidei.
Nec dubium, quin Græci ad ostentationem facti, quæ
ab orientalibus acceperant, multa celarint, ut sua es-
set inventionis gloria. De cætero, scientiæ erant cum
religione & statu politico commixtæ, adeoque inter
arcana habebantur, quæ est ratio, cur modo ænigma-
tico propositæ fuerint, & per symbola hierogly-
phica, quod apud Ægyptios præsertim obtinuit. Quæ
sic erant involuta, non intelligebant alii, quam quorum
erat scientias ex professo tractare, & eo facilius erat
hæc oculere secreta, ubi patres ipsi filios instituebant.
Conditio eruditorum nullibi lautior fuit & magnificen-
tior. Quæ ad vitam commode & jucunde agendam per-
tinent, hæc illis affatim suppetebant. Regibus ipsis
honore erant proximi, & in gravissimis negotiis pu-
blicis consulebantur; proinde scientiarum influxum in vi-
tam humanam & civilem optime perspicere potuerunt.
Hæc quamvis ita fuerint, quod in multis a vero deflexe-
rint, & falsissimas foverint opiniones, ipsa veritas fateri
cogit. Vanitas astrologiæ Chaldaicæ & olim fuit, & ad-
huc

huc est famosa. Duo principia, unum bonum, malum alterum statuebant Persæ. Præterea, Orientalium Metaphysica innumeris scaterebat erroribus, qui in Ecclesiam postmodum transfusi, horrendas progenuerunt hæretes. Hæc erat facies eruditionis Orientalium, usque dum arma Alexandri viciticia ut in statum civilem, ita quoque literarium Asiae atque Ægypti maximam inferrent mutationem. Successores namque illius, & linguam & scientias in suis quisque regnis propagare nitebantur. Hinc tamen non extinguebatur vetus eruditio Orientis, sed serviebat quodammodo, & cum Græcanica quandoque misceretur.

§. II.

Orientales excipiunt Græci, apud quos artes ingenuæ, & scientiæ omnes commodum satis ac jucundum habebant domicilium, præsertim Athenis, quæ doctrinarum omnium inventrices, & totis orbis gymnasium audiunt Ciceroni. Quum ab Oriente accesserint Græci, quod præter sacra profana quoque docet historia, dubitare non licet, quin primi advenæ aliqua secum attulerint scientiarum rudimenta, quibus deinde frequens cum Orientalibus commercium addidit augmentum. Orientali autem scientiæ in Græciam transvehendæ plurimum contulerunt Græcorum apud Orientales peregrinationes, hanc solum ob causam institutæ. Homines namque discendi avidissimi, viros eruditionis fama celebres, ubicunque inveniri poterant, adiverunt, nec ullis se obstaculis impediri passi sunt, quo minus in eorum penetrarent arcana. In eis vero, quæ a peregrinis mutuati sunt, non adquieverunt, sed mul-

ta excogitarunt ipsi, & aliena cum propriis ita miscerunt, ut novam acciperent formam. Vetustissimum doctrinæ genus erat Poësis, qua Philosophiam tradebant, prout inter omnia, qua exstant monumenta gentilium, Homeri & Hesiodi opera sunt antiquissima. Tanti autem vena Græcanica visa est posteritati omni, ut qui eam proxime æquarent, fastigio artis proximi fuerint judicati. Artem poëticam primus consignavit Aristoteles, cui insigne adhuc manet pretium. Ut antiquitate Poësis, ita præmiorum amplitudine ac dignitate, primum sibi locum vindicavit Eloquentia civilis, apud Athenienses imprimis, ubi qui facultate dicendi valabant maxime honoribus ac potentia cæteris præstabant; quare non potuit non copiosa provenire Oratorum fæges, inter quos eminet Demosthenes, singulare eloquentiæ exemplar. Nec defuerunt, qui artem dicendi præceptis comprehendenderant, sed quorum non pauci, pro vera & genuina, fallam ac spuriam docebant Eloquentiam, cuius hoc præcipuum erat artificium, ut de quacunque re in utramque partem differere, & aperte falsa veri specie induere possent. Non ambigimus, quin meliora protulerit Isocrates, communis ille Græciæ præceptor, cuius ex schola, dicente Cicerone, tanquam ex equo Trojano præstantissimi prodierunt Oratores. Inter illa, quæ ad nostram ætatem devenerunt scripta rhetorica, antiquitate primum est Aristotelis, quod omnes quidem artis hujus partes non complectitur, quæ tamen tractavit, ita exhaustis atque absolvit, ut quæ illis addi deberent, superfluerint pauca. Cum liberate reipublicæ cecidit Eloquentia civilis, ut quæ prius fuerat

fuerat res maxime seria, in lusum deinde scholasticum abierit, & ubi nulla amplius erant comitia, quomodo in comitiis esset perorandum, multis tradebatur.

¶ Phœnicibus Arithmeticæ, ab Ægyptiis Geometria, a Chaldæis Astronomia ad Græcos fuerunt delatae. Quas ab exteris Græci acceperunt scientias mathematicas, has diligentissime excolebant, imprimis Geometriam, ut quæ ad nostram pervenerunt ætatem, Euclidis, Apollonii & Archimedis opera comprobant, quibus insigne adhuc est pretium. Neque Astronomiam negligebant, ceu quæ adhuc superflunt scripta Ptolomæi ostendunt. Operam quoque dabant Geographiæ, sed quæ navigatione non satis exculta, & orbe qua maximam partem adhuc ignoto, admodum erat imperfecta. Qui physicæ apud Græcos sese applicuit, primus fuisse perhibetur Thales Milesius, quem ahii deinde excipiebant multi, quorum præcipuum erat negotium, inquirere de origine mundi, quem suo quietibet ingenio fabricabat, unde tot prodierunt cosmogoniæ, expressa stultitiæ monumenta. Experientiam, quæ in scrutinio naturæ omne ferre debet punctum, missam faciebant, quo factum, ut mera figmenta & fabulas procederint, quibus ut siuum esset complementum, speculationes ontologicas addidit Aristoteles. Mirum, quod in tali rerum statu experientiæ Medicinam superstruere potuerit Hippocrates, cuius doctrina in plerisque firma huc usque constitit, & posthac consistet. Quod philosophiam Græcorum attinet, genius sophisticus plurimi eorum adeo erat familiaris, ut de rebus quibuslibet prolixos ferere sermones,

nes, quam duce experientia, veritatem indagare malent, quare strenuam Dialecticę navabant operam, prout tota illorum Logica ad disputationes potius, quam veritatis investigationem fuit comparata. Accesit vanitas ostentationis, genti huic domestica atque nativa, ex qua radice, copiosa illa opinionum sectarumque seges excrevit. De Deo absurdissimas non pauci lovebant sententias, quarum nocentissima est eorum, qui Divinitatem cum mundo confundebant; ex quo fonte duo errores contrarii, atheismus & superstitione pariter proveniebant. Nec pauciora de nobiliori hominis parte monstrata opinionum extiterunt, quam ut cætera præterea quidam Divinitatis particulam fingebant. Doctrinam moralem parcus tractarunt Græci ante Socratem; hic autem totum se ei confecravit, quare philosophiam de cœlo devocasse dicitur Ciceroni. Socratem quidem auctorem deinde sectæ citabant omnes, sed quum nihil ipse scripsisset, de variis argumentis disputare tantum solitus, quæ a mente ejus erant alienissima pro Socraticis haud raro venditabant. Id certe constat, quod Socrates de Deo & providentia optime sensit, prout animæ quoque immortalitatem afferuit. Hanc autem quum negaret Epicurus contra sensum Socratis, sic doctrinæ morum feralem incussit iustum. Fatum quoque Stoicum, quod libertatem humanam destruit, utique a mente Socratis abhorrebat, ut raseam, quod ipsum systema philosophiæ Stoicæ penitus introspectum, in Atheismum desinere deprehenditur. Qui Socratem audivit Plato, ea tradidit, quæ ducunt ad fanaticismum, quem

quem etiam sequiori tempore in ecclesia s^epe pro-
genuit. Doctrina moralis Aristotelis, subtilitatibus on-
tologicis referta, in philosophiam Scholasticam transiit.
Principia inter Gr^aecos erat contentio de fine bono-
rum, quem suo quisque ingenio convenientem pone-
bat, & quidem talem nonnulli, qui nihil habuit cum
honestate commune. Ut veritatem omnem, ita mo-
ralem quoque sustulerunt sceptici, qui an serio sem-
per egerint, jure dubitare licet. H^ac autem sic ac-
cipienda non sunt, ac si Gr^aecorum doctrinam mo-
ralem omnem rejiciamus. Absit. Quin potius con-
cedimus, quod, ut in reliqua eorum philosophia non
pauca praeclara, ita doctrina morum varia continuⁱ
laude sua haud defraudanda; prout hoc illis compe-
tit meritum, quod disciplinas philosophicas primi in
ordinem systematicum redegerint. Quæ ad Politici-
cam spectant, multa erant comprehensa antiquis Gr^a-
ecorum legibus, inter quas præstant Solonis atque Ly-
curgi. Doctrinam civilem libris de republica atque
de legibus explicitu^r Plato; sed qui talem formavit ci-
vitatem, quæ luxurianti ejus ingenio, quam præsen-
ti rerum humanarum conditioni est convenientior.
Præferendus omnino est Aristoteles, cuius libri poli-
tici suum adhuc refinent pretium. Nec pauca, quæ
ad hoc argumentum pertinent egregia, apud Oratores
occurrunt. Optimi prudentiæ civilis magistri sunt hi-
storici pragmatici, quos Gr^aacia tulit præstantissimos,
quales erant Thucydides, Xenophon, Polybius, Plu-
tarctus & alii. Cum ipso imperio se longe lateque
propagarunt artes Gr^aecanicæ, in primis Alexandriæ
diu-

diuturnam habuerunt sedem. Neque cum a Roma-
nis victa, & in provinciæ formam redacta esset Hel-
las, illam deserebant Musæ, sed ita remanebant, ut
ipsos victores amore sui incensos allicerent. Atque
credibile est, servientibus Græcis hoc propositum fui-
se, ut quum gloriam armis parram perdidissent, ar-
tium ingenuarum cultu apud ipsos victores aliquid
saltem sibi pignerarentur æstimationis.

§. III.

A Græcis ad Romanos transmigrarunt arres litera-
riæ. Circa tempora Numæ Pompilii, vel ut alii sta-
tuunt, paulo post Pythagoras in Italia docuit; cuius
ibi philosophia aliquamdiu permanxit, inde Italica di-
cta; de qua quin aliquid inaudiverint Romani, nul-
lum est dubium; quod autem Romæ aliquos inven-
erit cultores, nulla constat monumentorum fide. Quan-
ti fecerint Romani prudentiam legislatoriam Græco-
rum, satis ostenderunt, cum jus civile condituri, mit-
terent in Græciam legatos, qui antiquas Græcorum
leges describerent, descriptasque tecum referrent, quod
ita successit negotium, ut ex his qua maximam par-
tem conflatæ fuerint XII. tabulæ, prima juris Romani
elementa. Reliquam eruditionem Græcanicam negli-
gebant, usque dum bellis punicis magis innoteſce-
rent Græci, & ex illis viri eruditi in familiaritatem
reciperentur. Post subjugatam Græciam, tanti æsti-
marunt Romani artes Græcanicas, ut vel Athenas
profecti, eas discerent, vel Græcos doctrina celebres ad
se vocarent, eorumque proficerent institutione. Sic
factum est, quod canit Horatius:

Græcia

Græcia capta ferum victorem cepit, & artes
intulit agresti Latio.

Prima ad Romanos transiit Poësis, quæ initio rudis
erat, ceu indicant Actii & Ennii, quæ superfunt, fragmen-
ta; postmodum vero imitatione Græcorum hanc artem eo
provexerunt, ut si non superaverint, saltem æquarint ma-
gistros; quod seculo præsertim Augusti contigit, quo
floruerunt Virgilius, Horatius & Ovidius, Latinorum
Poëtarum principes. Ut, dum libera erat regiminis for-
ma apud Romanos, maxima præmia Eloquentiam ma-
nebant, ita præstantissima quælibet ingenia eidem se
applicuerunt. Quin ante receptas disciplinas Græcani-
cas neque Svalæ Romanæ sui defuerunt cultores, qui
tamen ingenio potius & exercitatione, quam certa
quadam arte valebant. Post vero admissas exteris sci-
entias, ad præcepta & imitationem Græcorum con-
formata etiam fuit Eloquentia; quo in studio tantum
profecit Cicero, ut non cives modo suos vicerit, sed
Græcis, & quidem ipsi Demostheni dubiam reddiderit
palmam. Proximum post Eloquentiam locum obtinuit Ju-
risprudentia. Cum imperio enim sensim augebatur le-
gum multitudo, quæ æque ac illud in vastam tan-
dem excrevit molem; quarum proinde operosa inter-
pretatio multorum fatigavit industriam, multisque ho-
norem peperit & lucrum. Scientiis Mathematicis ple-
risque parcior apud Romanos erat tractatio; in Ar-
chitectura tamen Civili id præstiterunt, quod nostra
quoque miratur ætas, prout Vitruvio singularis ad-
huc manet honos. Qui tot populos, tanto scientiarum
subsidio munitos, subegerunt, quod Architecturæ Mi-

litaris non fuerint imperiti, res ipsa loquitur. Naturalem Scientiam parum curarunt, instar speciminis tam
enem esse possunt, quæ Seneca tradidit in quæstionibus naturalibus. Historiæ Naturalis insigne monumen-
tum edidit Plinius. Maximi siebat Agricultura, prout
qui superstites adhuc manent rei rusticæ Scriptores su-
non sunt laude fraudandi. Metaphysica ut cæteræ, quæ
ad Philosophiam Theoreticam pertinent disciplinæ, ne-
gotiosis illis Romanis se minus commendarunt. Magis
arridebat Doctrina Moralis, in qua viri graves Stoico-
rum, vitæ voluptuosæ dediti Epicureorum placita ad-
optabant. De Romanis autem constat, quod nulla
apud eos secta philosophica exorta fuit, sed alii Py-
thagoram, alii Platonem, alii Aristotelem, alii Zeno-
nem, Epicurum denique alii in philosophando duces
sequebantur. Quæ igitur de Græcis diximus, de Ro-
manis quoque dicta sunt, nisi quod non hi æque ac
illi, vanitati sophisticæ obnoxii essent. Si usquam, certe
apud Romanos viri extiterunt prudentia politica in-
struictissimi, quam tamen actione magis rerum, quam
ex librorum lectione comparabant; quamvis neque ibi
detuerint, qui monumenta sapientum pervolverent,
suosque in usus converterent. Quod si libri Ciceronis
de Republica ad nos devenissent, in iis utique optimus
Doctrinæ Civilis thesaurus suppeteret. Ut rerum
æterna memoria dignissimarum abundantissima fuit ci-
vitas Romana, ita neque præstantissimis carebat Histo-
ricis, inter quos eminet Salustius, Livius & Cornelius
Tacitus. De cætero extra controversiam est, quod nun-
quam res literaria apud Romanos ita floruit, atque
apud

apud Græcos, cuius rei variæ dari possunt rationes. Simul ac togam virilem acceperant cives Romani, quod anno ætatis XVII. fiebat, militare cæperunt, reliquis institutis prævalente re militari, per quam eundum erat ad honores etiam civiles. Sic ætas Musis convenientissima Marti consecrabatur. Deinde amplitudo imperii, & negotiorum toga sagoque obeundorum multitudo viros maturioris ingenii ita occuparunt, ut artibus literariis parum temporis superesset, nisi quod excellentissimis quibusdam ingeniis recreationis loco erat studium literarum. Neque bella tantum externa Musis obstrepebant, sed quæ sæpius intercurrebant civilia, longe deteriore illis inferebant pestem. Quæ ab his malis vacua erant tempora, post introductam regiminis formam monarchicam, indentidem interveniens tyrannorum crudelitas fædavit. Ingruit tandem periodus literis non minus quam ipsi imperio fatalis, qua tranquillitate publica per iteratas exterorum invasiones sublata, in eum devenerunt statum Romani, ut magis de vita conservanda, quam scientiis colendis cogerentur esse solliciti. Varias hoc tempore bibliothecas flammis urbium involutas periisse, & sic multa antiquitatis monumenta posteritati sublata esse, passim queruntur Scriptores.

§. IV.

Post occasum imperii Romani, artium ingenuarum ignorantia, sive barbaries magis magisque invadescerat. Calamitus hic status non ex bellis tantum est repetendus, quamvis & hæc tum fere continua non

parum ad illum contulerint, sed aliae omnino, & quidem potiores ejus causae inveniuntur. Inde a primo, quo per orbem se diffundere cœpit religio Christiana, tempore, literatos ac philosophos gentiles acerrimos offendit adversarios, qui eruditione sua ad illam impugnandam abutebantur; unde factum, ut omnis eorum doctrina profana & secularis haberetur. Atque post Imperatores ipsos ad sacra Christiana conversos, qui extra Ecclesiam erant, licet his eam armis invadere non auderent, quum eundem retinere animum deprehenderentur, eadem quoque de disciplinis ac libris eorum Christianis Doctoribus mansit sententia. Quamobrem, quomagis augebatur S. monarchiæ potestas, eo durius experiebantur fatum artes profanitatis damnatae. Zeli hujus improvidi singulare dedit documentum Papa Gregorius primus, Magnus dictus, quum studium Matheseos proscripteret, & optima antiquitatis monumenta fatali rogo imponeret. Perivasum namque fuit, homines Deo dicatos & posse & debere carere scientiis, quæ veræ pietati haud exiguum objicere impedimentum putabant. „Neque „in Episcopis & sacerdotibus requirebatur peritia S. Scri- „pturæ, multo minus linguarum, disciplinarum & an- „tiquitatis notitia, sed modo ut legere, ut cantare, ut „Orationem dominicam, Symbolum, Psalterium, Com- „putum recitare valerent, nec necii essent Canonum, „quæ sunt verba Spanhemii in Comp. Hist. Eccles. p. „229. Atque ut in tuto collocaretur eorum ignoran- „tia, Jure Canonico sanctum erat, ne quis Episcopo- „rum ac presbyterorum barbarissimos irriteret ac solœ- cismos;

cismos, quum indignum esset, sanctos illos viros re-,
stringi sub regulas Donati. A monachis vero non a-
liud exigebat, quam ut cantare, & certas precum
formulas recitare valerent. Scientiarum culturam,
ut adhuc nonnulli, ita cum plurimi, statui eorum in-
convenientem judicabant. In templis cathedralibus at-
que cœnobiosis erant quidem scholæ, quibus septem
illæ artes liberales tradebantur, sed quid ibi profice-
retur, quum qui docerent, ipsi rudes essent atque in-
docti? Sic non potuit non crassa ingruere barbaries.
Nec leve addidit momentum emortua lingvæ Græcæ
intelligentia, ut in proverbium abiret: Græca sunt,
nec legi possunt, nec intelligi. Quin etiam Latina, il-
la sacri cultus ministra, sensim ita corrumpebatur, ut
nihil omnino nativæ puritatis retineret, adeoque La-
tium in Latio esset peregrinum. Reformationem quan-
dam literarum suo tempore moliebatur Carolus Ma-
gnus, dum viros eruditos conquisivit, scholas instau-
ravit, variisque legibus statum rei literariae forma-
re Voluit. Verum inveteratum adeo malum lon-
giori indigebat medicina, quam ut unius ætas at-
que industria eidem sanando sufficeret. Nec erant
deinceps, qui debito nisu collapsæ rei literariae suc-
currere studebant, sed parim bella, partim quæ altiores
indies radices egit superstitionis, effecerunt, ut omnia ad
pristinam relaberentur miseriam. Testantur hoc, quæ
proxime insequebantur secula, notum puta atque de-
cimum, quibus adeo invaluit superstitionum illud o-
tium, ut eadem infelicia, & idoneis scriitoribus de-
stituta appellare non dubitet Bellarminus. Nec Mi-
rum.

rum. Erat tanta seculi potissimum decimi cæcitas, ut studia, tanquam professionem inhonestam inter quisquilias & purgamenta rejicerent pinguia ingenia, & qui his diligentius, quam mos tulit, insudaret, hæreticis adnumeraretur. Si quis in lucem aliquid proferret solidi, cuius magnitudinem non capiebat monachorum stupiditas, magus ipsis videbatur. Sequentibus deinde seculis per Europam se magis propagarunt studia literarum, & in primis Scholastici magnum dederunt strepitum. Multum vero absfuit, quominus literis ac scientiis hi genuinum restituerent decus, qui divina humanis miscentes, barbaris iordibus, & infinitis subtilitatibus & subdivisionum subdivisionibus doctrinam suam conspurcarunt; adeo ut, quæ a splendore suo dudum defecerat eruditio, miserum sub eorum lima nanciceretur nitorem. Varia, quæ tum erecta erant Musarum domicilia, vinculis suis constrieta tenere noverant Pontifices, variisque artibus efficere, ne barbariem, firmum illud status hierarchici fulcrum excuterent, prout tota eorum compages, ex ratione status papistici digesta fuit ac ordinata. Sic quod inter Boëthium, quoad eruditionem ultimum Romanorum, atque Franciscum Petracham, interjectum est mille circiter annorum intervallum, barbariem complectitur, in qua tamen pro diversitate temporum, gradus diversi reperiuntur.

§. V.

QUAMQUAM dulcedo otii superstitionis animos ceperat docentium atque discentium, contemnitus bonarum artium inoleverat, imo dirum in literas & literatos

ratos haud raro exarserat odium, hæc tamen omnia
id efficere non potuerunt, ut sub ipsa barbarie omnis
emoreretur eruditio. Quin potius constat, extitisse
sidera, quæ ipsas barbariei tenebras intermicuerunt.
Nec dubium, quin plures adhuc fuerint vera & soli-
da scientia instructi, dum seculorum infelicitas impe-
divit, quo minus scriptis in publicum prodirent. Ne-
que concipi potest, aliquos in studiis tantum profi-
cere potuisse, nisi essent alii, quorum institutione u-
terentur. Per hos propagata fuit eruditio, quæ tan-
quam ex cryptis & latebris tandem prorupit, dum
viætis obstatulis, aliquanto liberior Musis concedeba-
tur aura. Vanus tamen fuisset omnis ex barbarie e-
luctandi conatus, nisi impotens Papæ dominium, quo
non alia tenacior erat veræ eruditionis remora, a-
liquantum imminutum fuisset. Id vero exortis in
regno papistico dissidiis factum est, & quidem eo præ-
fertim tempore, quo duo aut quandoque tres erant,
qui sumimam sibi in sacris potestatem assererent. Nec
parum ad hoc valebant Constantiense & Basileense
Concilia, monarchiæ papali minime amica. De cæte-
ro adeo manifetti cum fieri cæperunt mœres Ponti-
ficium, ut qui aliquid videbant, intelligerent omnes,
neque Ecclesiæ neque Rempublicam stare posse, ni-
si enornis eorum licentia suos intra limites coérce-
retur; quod cum facile animadverterent Reges hi sa-
crorum, non animum quidem, sed modum agendi mu-
tarunt, dum idem quod antea, minus tamen acerbe
exercuerunt imperium. Proinde, quæ decimo tertio
& decimo quarto seculis plures conditæ fuerunt Aca-
demiæ,

demiæ , mitiorem etiam servitutem experiebantur. Quin etiam ad alios extra illas degentes, eadem ~~haec~~ libertatis præludia spectabant; unde quæ metus huc usque in obscuro continuerat ingenia, sensim in lucem procedebant. Primos inter effulsit Franciscus Petrarcha, novum orbis literati lumen compellari meritus , illis Eloquentiæ solutæ & ligataæ , pariterque Philosophiæ Moralis præsertim atque Civilis editis documentis, quæ communem seculi genium longe superabant. Hunc plures deinde alii sequebantur. Qui post Constantinopolin a Turcis captam in Italiam de- venerant Græci exules, non linguam tantum Græcam , sed Philotopiam etiam & scientias Latio secum invexerunt. Sic non copiosa modo supellex ve- terum librorum in Italiam transvehebatur, verum mit- tebantur juxta alii, qui monumenta literaria, post fatalem adeo casum reliqua, apud Turcas undique con- quirerent, quibus facile fuit, post pretium sibi tradi- tum, thesauro ejusmodi cartaceo carere. Excitaba- tur quoque per advenas hosce industria occidentalium , qui nullo modo videri volebant Græcis inferiores . Nec parum momenti ad progressum literarum hoc tempore contulerunt Principes, qui literati ipsi, literatis hortatu, auxilio , sumtibus atque commen- datione adfuerunt. Hinc primum in Italia revivisce- re cœpit linguae Græcae atque Orientalium notitia, & præter illas Latina quoque adeo excolebatur, ut quæ haetenus regnaverat stibligo monachalis, in stilum Ciceronianum fuerit mutata. Paucis, Philologia o- mnis, Hebræa, Græca & Latina, superstitione, & ad in- vidiana

vidiam reliquarum scientiarum fuit exculta, ut verbis utar Morhofii in Polyhist. Tom. I. Lib. I. Cap. I. §. XVI. Laborantibus ita magna animorum contentione in cultura literarum provehenda optato subvenit ars typographica, præclarum adeo inventum, quo non viderat res literaria salutaritus. Brevi per eam communicata sunt orbi eruditio veterum opera, quæ antea manuscriptis comprehensa, paucorum manibus terebantur. Hinc aucto librorum numero, minor quoque esse cœpit eorundem caritas, & major Musis operantium proventus.

§. VI.

HÆc autem quantacunque videri possint, quæ certe non erant minima, barbariei tamen eradicandæ, & artibus literariis atque scientiis oportatum in florem evehendis neutiquam sufficiebant. Nam plerisque in Academiis Philosophia Scholastica, illa barbariei filia & assertrix adhuc regnabat, Theologiæ quoque cognomini, quæ tantis religionem tenebris involverat, longo temporis usu eo deuentum fuerat, ut jam ipsius Ecclesiæ auctoritate se tueretur. Utramque satis in se deformem, qui ceu pallium in curia Romana consecratum, vestiebat stylus barbarus, adhuc magis deturpabat. Quibus igitur ad hæc monstra invadenda animus erat, hi vindices regni tenebrarum in se concitabant, eorumque excipere cogebantur calumnias & persecutions, quod ipsi, quem honoris causa nominavimus, Francisco Petrarchæ, aliisque ejus vestigia legentibus fuit experiendum. Ut ad principes veniamus Philosophiæ partes, Doctrinam

nempe Moralem & Civilem, quis crederet has in custodiis papismi integre & incorrupte tradi potuisse? Nec enim pauca inveniuntur hominis & civis officia, quæ fronte adversa cum legibus & institutis papisticis pugnant. Quod si vero quis isto tempore, jura Principum circa Sacra plenius evolvere suscepisset, huic novissima cathedra rogus futurus fuisset, merces vivicomburium. Hinc igitur constat, necessarium omnino fuisse, ut magis, quam hucusque factum fuerat, regnum papisticum coerceretur, si barbaries fugari, & res literaria ac scientiæ in statum floridum exflurgere possent. Mutationem hanc, qua sive Sacram, sive Civilem, sive Literariam spectemus Rempublicam, orbis non viderat illustriorem, ex singulari Providentiæ regimine tandem produxit magnum & incomparabile reformationis opus. Ipse reformatorum primipilus Lutherus non acrius cum Jove Romano, quam magistris, Parisiensibus, Coloniensibus, Lovaniensibus, aliisque id genus barbaris depugnabat. Quantum ad bonarum artium incrementum contulerit Melanchton, communis ille Germaniæ præceptor, quis ignorat? Et sacris purioribus quamvis se non aper-te addixerit Erasmus, vix alius tamen reperitur, qui vitia papismi eo detexit ingeniosius, & in iis barbariem lepide magis deridendam exhibuit. De cætero, ipsum religionis negotium, & controversiæ inde ortæ certa studiorum genera accenderunt. Qui ad Sacrum Codicem provocarunt, his eo ipso injunctum fuit studium lingvarum, Græcæ, Hebreæ, cæterarumque Orientalium. Et alteram partem, ne his armis nudi

nudi paterent, eadem stringebat necessitas. Qui traditionum obtentu impugnabantur, in veritatem earum inquirere non intermittebant, quare ab utraque parte acuebatur industria in studio antiquitatum. Historiae eadem fuit ratio, dum Centuriatores Magdeburgici excitarunt Baronium, & sic porro. Ubique fervebant certamina, quum Academiæ, fulciendo papismo destinatae, in terris protestantium fortissimæ factæ fuerant ejusdem oppugnatrices, neque cæteræ, quæ in obsequio Pontificis manserant, suarum partium oblita videri volebant. Id vero, quod rem literariam attinet, singulare ac præcipuum est reformationis beneficium, quod per hanc jugum servitutis papisticae est excussum, & illa philosophandi libertas vindicata atque concessa, quæ ad scientias excolendas ac provehendas requiritur. Huic libertati acceptum ferendum est insigne illud incrementum, quod variae fecerunt scientiæ, quæ sub papismo caput extollere nunquam potuerint. Eidem huic libertati debetur, quod ipsa vita humana atque civilis, infinitis propemodum est liberata erroribus, qui in papismo nati & enutriti, cum eo perpetim mansuri suiscent. Nec dubium, quin multum hujus lucis ad eos etiam transierit, qui adhuc subjacent papismo. Interim verissimum esse non desinit, quod hic ubi maxime viget, ibi servitus literaria etiam obtinet maxime, ceu Italiæ atque Hispaniæ in primis docent exempla; prout quæ barbariei tessera est Philosophia Scholastica, in Academiis Pontifici obnoxiiis adhuc retinetur & colitur.

§. VII.

AD propositum igitur ut proprius veniamus, varia jam considerabimus instituta, quæ præsentem progenuerunt rei literariæ & scientiarum felicitatem, eandemque etiamnum sustinent promoventque. Primum hic se offerunt Scholæ illæ superiores, Academiæ dictæ, quarum numerus post tempora reformationis insigniter est auctus, atque hoc etiam seculo, imo recentissimo tempore novis accessionibus crevit. In his cum religione sanctissima, omnes quæ ad eruditionem aliquid conferre possunt linguae, omnes quæ ad humanitatem pertinent artes, quæ ad vitæ humanæ atque civilis regimen valent, vel rerum necessitatí, aut delectationi inservientium copiam parere aptæ sunt scientiæ. omnes traduntur. Adsunt publici Doctores, qui pensis inter se divisis, pro parte quilibet virili, sua munera extequuntur. Adsunt etiam reliqua subsidia, de quibus in sequentibus dicendum. Quæ societatibus hisce in papismo inhærent vitia, in proxime antecedentibus innuimus; neque ut cæteræ omnis nævi sint expertes, credere permittit communis rerum humanarum conditio. Hoc tamen illarum fatis vindicat honorem, quod in iis enutriti sunt, qui Reipublicæ non tantum Literariæ, sed Ctiā Civiliū Iūmina evaserunt. Præter Academias exstant quoque Scholæ inferioris ordinis & magno quidem numero, in quibus cum sacratori doctrina linguae & scientiarum principia inculcantur, adeoque puerilis ætas maturioribus rite percipiendis præparatur. Hoc beneficio etiam illi, quibus res augusta domi privatæ informationis copiam denegavit, ad Sacra Muſarum admittuntur;

quam-

quamvis institutionis publicæ præstantia prudenter considerata, etiam viris faventiori mercurio usis, quandoque perswasit, ut suos in hanc traderent disciplinam; quod saepe non sine insigni emolumento fieri, multiplex docet experientia.

§. VIII.

IN Officinis quidem hisce literariis, & Academiis præsertim, omnes & lingvæ eruditæ, & scientiæ strenue sunt exultæ; nec ulla reperitur eruditionis pars, qua hic insignibus non sit proiecta incrementis: quum tamen in illis singuli seorsim suas agant partes, in gravioribus autem negotiis multum conducat plurium inter se sociata opera; ad promovenda quoque literarum studia, variasque in primis artes & scientias novis inventis augendas, ut plures junctis viribus concurrent, visum est necessarium. Societates, quibus id optime fieri possit, pro singulari, qua valuit perspicacia, variis in operibus, præcipue vero libris de Augmentis scientiarum & nova Atlantide, magnopere commendavit & accuratissime descripsit Baco de Verulamio; qui tamen Historiæ & Scientiæ Naturalis artiumque hinc prodeuntium cultum potissimum spectat. In Italia autem Societates istæ primum cœperunt, ubi perplurimæ fuerant, atque etiamnum sunt. In Gallia Iuadente Richelio, pro perficienda lingua vernacula, condita est Academia Francica (Academie Françoise). Ad formam a Verulamio expressam, in Anglia, regnante Carolo II. instituebatur Societas Scientiarum Londinensis. Ad hujus imitationem in Gallia, sub Ludovico XIV. ex consilio Colberti, magni illius artium ingenuarum patroni,

erata

enata est Academia scientiarum Regia (Academie des sciences) Accessit eodem Colberto commendante, Academia elegantiarum literarum, (Academie des belles lettres). Hoc seculo in pluribus Europæ regnis tales prodierunt Societates. Nec in ipsa tantum Parisiorum urbe aliæ sunt additæ, sed in singulis tere Gallæ provinciis novæ erectæ. In Italia ejusmodi conventum satis antea teraci, nec pauci sunt adjecti. Sua quoque Collegia literaria Hispania accepit, pariterque Portugallia, imo hæc in Brasilia unum. Idem de Anglia & Belgio fœderato constat. In Germania vero ejusmodi Societates plures omnino sunt exortæ, inter quas celebres maxime habentur Societas naturæ curiosorum Leopoldina & Societas Berolinensis. Dania non ita pridem Academiam scientiarum obtinuit. Muscoviam Petropolitana illustrat. Neque Svecia hujus felicitatis est expers, que præter Societatem scientiarum Regiam Upsaliensem, Academia scientiarum Regia Holmiensi claret, cujus ea jam est dignitas, ut ejus acta linguis peregrinis induita, orbem eruditum percurrent. Quid? quod extant viri longe celeberrimi, qui ut hæc & alia monumenta in ipsis fontibus intelligerent, linguam Svecicam addiscere non duxerint grave.

§. IX.

IN his, quas jam læpe diximus Societatibus, excolluntur scientiæ Mathematicæ, Geometria & Algebra, Astronomia, Geographia, Mechanica, Architectura Civilis & Militaris, Res nautica, Ars pictoria, sculptoria & statuaria, Historia Naturalis, Physica experimentalis cum Chemi-

Chemia, Oeconomia, &c, quæ ad illam pertinent **Agricultura**, Res metallica & Artes manuariæ, Medicina denique tota cum Chirurgia. Accedit Philologia multiplex, Græca, Latina, Orientalis, & quod ad hanc spectat, Antiquitatum studium. Neque negligitur Historia cujusque gentis patria, cum illis, quæ eandem illustrant Antiquitatibus. Linguae pariter singulis populis vernaculae expoliuntur & perficiuntur, quod eo succedit melius, ubi iisdem Eloquentia & Poësis exercentur. Nec parum hoc promovet institutum, quæ patro sermone tantum non ubique peragitur scientiarum cultura. In Republica literaria hospes adeo poterit esse nemo, ut quæ recensita sunt, omnia in singulis hisce Societatibus quærat; satis namque constat, hæc ita esse divisa, ut quædam plures, aliæ pauciores, nonnullæ unam aliamve scientiam sibi tractandam elegerint. Quid autem præstiterint, quæ in publicum edita sunt acta, ostendunt.

§. X.

AD varia jam literarum & scientiarum subsidia speranda progredimur. In his primum sibi locum vindicant Bibliothecæ, quarum in orbe præsertim Europæo ingens est multitudo. In Gallia Parisiorum urbs illis instructissimis gaudet. In Italia, & quidem Romæ Vaticana, in Anglia Oxoniensis sive Bodleiana, in Germania Vindebonensis, in Svecia Upsaliensis celebrantur; ut cæteras jam præteream, de quibus passim agunt rei literariæ Scriptores. Atque ubi est Academia, ibi quoque reperitur Bibliotheca. Quin neque Gymnasia sua carent librorum supellectile. Societa-

cietatibus quoque literariis, & Academiis Scientiarum saltem plerisque, cujusque instituto necessarii suppetunt librorum thesauri. Accedunt alia adminicula, diversis scientiis inservientia. Historiae Naturali res ex tribus naturae regnis collectae opitulantur. Botanicam siccillatim adjuvant horti botanici. Instrumenta variis experimentis instituendis idonea Physicæ ministrant. In speculis observatoriis Astronomia se extollit. Sudat in laboratoriis Chemia. Nec Medicinæ sua desunt adiumenta. Anatomiam, quæ Chirurgiæ quoque est fulcrum, theatra anatomica, Pharmaceuticam pharmacopæa, praxin medicam nosocomia promovent. Hæc omnia ubi adfuerint, prout hac nostra ætate variis in locis adfunt, quid ad scientias recte tractandas, & longius provehendas præter industriam & laborem ulterius requiratur, non video.

§. XI.

OMNEM hunc institutorum subsidiorumque apparatus singularis Principum gratia & beneficentia complectitur. Hi Academias condiderunt, variisque juribus immunitatibus & privilegiis ornarunt. Doctoribusque publicis ea, quibus sustentari possunt, concedunt salary; & ne juventus literarum studiis addicta, tantæ gratiæ exsors esset, hujus quoque egestati sua munificentia subvenierunt. Idem Gymnasia instituerunt & Scholas, Docentibusque in illis quantum vitæ sustinendæ necessarium est, erogant; nec quæ in hoc pulvere versatur pubes publicis caret beneficiis. Societas quoq; literariæ, & Academæ Scientiarum a Principibus ipsis fundatae sunt plures

res, sumtibusque publicis sustinentur, omnes autem illorum protectione gaudent atque tutela. Quæ in superioribus percuria sunt optimarum artium subsidia, qua maximam partem eidem Principum gratiæ debentur, quorum exemplo excitati magnates virique illustres, imo etiam privati, rem literariam ejusque commoda sua liberalitate auxerunt. Qui ad Reipublicæ literariæ hodiernæ commoda stricte heic recensita vel tantillum attenderit, quanta hoc intuitu status literarii præsentis sit præstantia, facile judicabit. Si namque ad antiquitatis memoriam regrediamur ultimam, inde usque repetendo, nullus reperierit populus, apud quem illa, quæ cultior Europa jam pluribus in locis ostentat rei literariæ adminicula, cuncta invenientur.

S. XII.

QUAM igitur, quæ artes ingenuas promovere possunt omnia, facto quasi certamine concurrant, quid pro tanto molimine in illis profectum sit, jure quæritur meritoque. Singularum eruditionis partium Historiam condiderunt viri doctissimi; nec scientia reperitur aut ars nobilior, cuius ortus, progressus & incrementa ad viciniora usque præsenti tempora integris libris descripta non extent. Ad pleniorum adhuc vasti hujus argumenti intelligentiam speccant numerosa Actorum volumina, quæ variis linguis consignata inveniuntur. Hos emetiri campos, ut nostras longe exsuperet vires, ita a nostro longe alienum est instituto, quum nobis sufficere videatur in genere tantum illa attingere, quæ ad præsentem optimarum artium pertinent conditionem.

D

Scientiæ
Mathe-

Mathematicæ ac Physicæ, & quæ vel his adminiculantur, vel inde pendent reliquæ, ut singularem nostræ seculi dignationem occuparunt, ita præ cæteris extulerunt caput. Geometria & Mathesis abstracta omnis, ab antiquis impense exultæ & longe provectæ, primum Algebræ, deinde Calculi differentialis nobili accessione se viderunt auctas. His inventis non solum quæ per longas ambages antea quærebantur, facilius jam & via admodum compendiosa demonstrantur, sed aditus etiam ad illa patet, quæ sine hisce subsidiis forent inaccessa; quamvis neque desint, quibus demonstratio linearis adhuc placeat, qui que in Geometria per illam perficienda sedulo versentur. Astronomia jam ad illud fastigium exsurrexerat, quod omnem antiquitatis expectationem excedit. Novi detectæ sunt planetæ, eorumque via & motus determinati. Novæ stellæ innumeræ oculo armato te præbent conspiciendas, atque novum prope universum in possessionem venit humanæ intelligentiæ. Cum Astronomia, quæ lumen ab illa mutuatur, Geographia crevit. Quum tamdiu inhabitayerant terram mortales, veram ejus figuram nuper illis cognoscere licuit, Longitudines locorum superiori ætate frustra quæstæ, per Satellites Jovis nunc determinantur. Restat adhuc excogitandum, in quo summa etiam elaborant ingenia, quomodo ex magno hoc invento nautentes percipient usum. Navigatio post pyxidem nauticam inventam, novum orbem detexit, & loca Europæis antea ignota innumera fere aperuit. Nec desinunt adhuc populi, quod de Anglis & Batavis in primis

mis constat, novas quærere terras, prout novas per
maria & treta navigationis vias tentant, non sumtu
majori quam periculo. Quod si Geographia antiqua
cum hodierna conferatur, tantum inter utramque de-
prehendetur discrimen, quantum est inter pygmeum
& gigantem. Quam exiguum erat quod Græci de
orbe hoc nostro noverant? quantillum Romani, illi
orbis domini? Nec prætereunda est, quam Principes
in sui quisque regni Chorographia accuratissime ex-
primenda impendunt cura, quam Svecia quoque &
præsertim Fennia gratulabundæ jam experiuntur. In-
ventorum Mechanicorum fertilis quoque fuit hæc æ-
tas; in primis Polhemius nostras suo illam ornavit
ingenio, copiosissimisque ejus proventibus ditavit.
Nec dubio carere videtur, an orbis tñquam habue-
rit parem. Architecturam Civilēm Itali præsertim
& Galli singulari studio excoluerunt, an vero inge-
niosam Romanorum luxuriam hac parte æquaverint,
aliis judicandum relinquo. In Architectura Militaris
nova prodierunt hand pauca, quorum non minima
portio Gallis debetur. Verum dum muniendi & mu-
nita oppugnandi artes æquis passibus procedunt, res
in pristino manet statu, atque perinde est, ac si ni-
hil ei accresisset augmenti. Qum post pulveris py-
ri inventum Architectura Militaris omnis novam in-
duerit faciem, inter antiquam & recentiorem nulla
datur comparatio. Res nautica insignem jam adsecuta
est perfectionis gradum. Ars navium construenda
rum Mathematico & Physico subsidio adjuta, eo
crevit, ut veterum hac in re scientiam longo post
D 2

se intervallo relinquat. De Arte navigandi quid dicam? Quantum hanc promoverit pyxis nautica dum constitit; ejus autem declinationes nostra ætate accuratissimis observationibus animadversæ, usum hujus ducis longe reddiderunt tutiorem. Astronomia magis exculta & in auxilium vocata navigationi quantum protuerit, quis ignorat? Atque si id, cuius modo facta est mentio, desideratum longitudinis in mari definiendæ accedat, locus, quo quis in vasto oceano volvitur, ita propemodum certus esse poterit, ac si in campo limitibus signato versaretur. De cætero, quæ vel in mari vel fretis vel sinibus latuerant tyrantium scopulorumque insidiæ, jam vel tristi naufragorum experientia, vel sedula fundum aquarum explorantium opera detectæ, securiorem effecerunt navigationem. Quæ ornatui potissimum & splendori inserviunt artes, pictoria & statuaria, Mathematico acumine magis magisque expoliuntur, & assiduas inter exercitationes ad summum perfectionis gradum contendunt, quod idem de Musica licet affirmare.

§. XIII.

QUÆ priscis temporibus neglecta plerumque jactuit, saltem ut par erat non curabatur Historia Naturalis, hæc jam tantum dignitatis obtinet, tot næcta est cultores, tantisque floret patrocinis, ut vix alia reperiatur scientia, quæ benignius fatum sibi gratulari queat. Prima ejus occupatio versatur in illis per tria regna naturæ inveniendis notis, quibus res & certo agnosci, & a se invicem discerni queant, rebusque ad sua genera & species revocandis.

Mirum

Mirum est, quod cum tanto tempore extiterit genus humanum, jam ad nominum impositionem, primum illud Adami negotium sit redeundum. Sed nulla ætas ad discendum sera. Quanti vero æstimanda sit characteristica hæc ars, prolixa non egit probatione. Quæ namque vel necessitatì nostræ inserunt, vel voluptati & delectationi, ut ex tribus naturæ regnis sunt depromenda, ita si ad usum adhiberi queant, agnoscantur oportet; qua deficiente notitia, haud raro ab exteris care redimendum est, quod patrium offert solum, ceu domestica damnosa illa quidem experientia didicimus. Proinde qui Historiam Naturalem tradunt, varios rerum usus, tam œconomicos, quam medicos explicant, & quæ ab iisdem imminent pericula, cavere docent. Neque intra hos terminos Historiæ Naturalis cultus continetur. Quidam rerum naturalium structuram & mechanismum accuratissimis microscopiis contemplantes, quæ sic obvia se præbent, observant, describunt & descripta exhibent spectanda. Alii ad magna conversi, terras, montes, maria, lacus pervestigant. Nec sufficit, quæ in propinquo sunt perlustrare, sed in remotissimas orbis partes emittuntur exploratores naturæ. Ut paucis dicam: Quidquid terra & mare, vel sua superficie ostentant, vel suis visceribus fovent & sinu, id omne quoisque humana penetrare potest industria, jucundissimum præbent campum, in quo se exercet Historia Naturalis.

§. XIX.

AD Scientiam Naturalem progredimur, Quam misera ejus

eius apud Græcos fuerit conditio §. II. innuimus, quæ nec apud Romanos melior esse potuit. §. III. De leculis barbaris non attinet dicere, quum per se patet, quod idem tum ac reliquæ Scientiæ subiit fatum. Post literas renatas, imo post reformationem religionis diu in vado hæsit. Ut enim Philosophia Scholastica a reformatoribus aliisque viris eruditis damnata, diu deinde mansit, ita qui Aristotolem in Physicalis sequebantur ducem, erant permulti. Alii alias ex Græcis sibi in hac pariter disciplina deligebant magistros, eorumque sententias longa seculorum oblivione sepultas, in lucem revocare nitebantur. Nec deerant, qui ipsum sollicitare Mosen, ejusque autoritatem suis somniis obtendere non erubescerent. Qui stupendo & ad scientias reformatandas divinitus destinato ingenio praeditus erat Baco de Verulamio, ut reliquarum, ita Naturalis præsertim Scientiæ vitia primus pervidit, variisque in operibus detexit, neque detexit solum, sed quomodo his malis occurrendum erat, solide exposuit. Ratio ejus huc redit, quod unica illa clavis, qua naturæ arcana referantur, sit experientia, cuius neglectus omnes illos peperit errores, quos hac in re & antiqui & recentiores commiserant. Experientiam autem intelligit, non vagam & fortuitam, sed constantem, & certis regulis adstrictam, quas ipse passim & in Novo potissimum Organo suppeditat. Pro dilatanda vero experientia Historiam Naturalem commendat, & quidem eam, quam Inductivam vocat, & quæ Scientiæ Naturalis sit fundamentum. Neque nullum Cartesii est meritum. Quamvis

vis ipse fabulam potius romanensem quam Physicam
scripsit, Matheseos tamen cum hac disciplina socian-
dæ gravis exticit autor, atque institutum hoc ma-
gis ursit, quam ipse Verulamius. Secundum hæc
principia constituta est Physica Experimentalis, quæ
cum experimentis ratiocinii Mathematica conjungit.
Hanc plures excoluerunt viri ingeniosissimi, inter quos
exst̄lender Illustris Isaacus Newtonus, qui communis
orbis eruditī consensu cæteris in hoc studio palmam
præripuit. Quod hæc via inventa sint multa, & qui-
dem prorsus egregia, qui in publicum editi sunt li-
bri, & Societatum acta, imo artes & opera loquun-
tur. Nec pauca adhuc restant, quæ dies aperiet.
Quod si quis credat, omnium phænomenorum causas
mechanicas proferri posse, hic viderit, ne vana
sibi spe illudat; exiliores quippe sunt, quæ corpora
constituant particulæ, subtiliorque illorum contextus,
quam ut sensui, vel optimis adminiculis adjuto ob-
veniant. Manent igitur plurima, quorum veritas
est manifesta, rationes vero latent latebuntque sem-
per. Huc jure quoque referri videtur, quæ nostra
præsertim ætate se prodere cœpit vis electrica, quam
admirantur potius quam intelligunt, qui varias ejus
operationes patefacere multiplici experimento la-
borant.

§. XV.

QUÆ sit Chemiæ antiquitas vel inde judicari pot-
est, quod sine hac neque panis aut cibus ullus,
præter herbas & arborum fructus, neque potus præ-
ter aquam alijs, neque terrum & metalla reliqua, &
varia

varia ex illis opera, nec denique innumera, quibus
gaudent homines, vitæ subsidia, parari potuissent.
Hanc inter veteres præsertim tractarunt Ægyptii, a
quibus ad Græcos, inde ad alios venit Europæos.
Quod seculis etiam barbaris conservata fuerit, Roge-
rii Baconis, Alberti Magni dicti, Arnoldi de villa no-
va & Raimundi Lullii exemplis constat. Atque con-
cedendum omnino est, quod ista ætate Scientia Na-
turalis, qualis quidem tum erat, penes Chemicos re-
sideret, quam, ne crimen magiæ incurreret clam sæ-
pe habere cogebantur. Negari tamen haud potest,
quin hæc scientia inde ab antiquissimo tempo-
re multum confusionis & obscuritatis habuerit, plu-
ribusque figmentis, superstitionibus & anilibus fabu-
lis fuerit contaminata. Qui sedulo illam excoluit &
ad Medicinam applicuit Theophrastus Paracelsus, plus
effecturus fuisset, suam nisi doctrinam inexplicabili
stile involvisset, & fanatica atque enthusiastica con-
spurcasset Philosophia. Quod ab his jam sordibus est
depurgata, recentiori ætati est vindicandum. Singula-
re in hanc scientiam est meritum magni illius Ro-
berti Boylei, qui subtili ingenio, pertinaci industria
multoque impendio illam excoluit, & quomodo recte
tractanda sit, suo docuit exemplo. Hunc deinde secu-
ti sunt Hombergius, Bohnius, Borrichius & alii, in-
ter quos eminet nostri seculi Æsculapius, Herman-
nus Bœrhaave, qui iuxta methodo & sveta sibi per-
spicuitate elementa Chemiæ consignavit. Fervet nunc
variis in laboratoriis artis hujus exercitatio, & no-
va indies pandit naturæ arcana.

§. XVI.

OEconomia, ut suam refert antiquitatem ad ipsam originem generis humani, maximamque ejus partem sibi habuit addictam; ita recentiori demum ætate in ordinem scientiarum est cooptata. Apud Græcos, præter Hesiodi opera & dies, librum œconomicum Xenophontis, Autores Geoponicos, apud Latinos, extra Georgica Virgilii & rei rusticæ Scriptores, quod huc pertinet vix reperitur quidquam. Jam vero non solum dignationem Scientiæ adepta est Oeconomia, & in cathedris Academicis doceri cœpta, sed omnes illæ, quas in antecedentibus attingimus disciplinæ, ad hanc perficiendam concurrunt. Atque, sive Rem rusticam & Metallicam, sive Artes & Commercia species, de his tot editi sunt & indies eduntur libri, ut eorum nec sit numerus nec finis. Novis inventis plena sunt omnia, præsertim vero Academiæ Scientiarum suis in commentariis überem horum exhibent messem. Neque res tota chartis continetur, sed quæ vel ingenio sunt excogitata, vel observationibus & experimentis reperta, hæc ad opera adplicantur, novaque expoliuntur experientia. Ut omnia, quæ in orbem prodeunt nova, optatum habeant successum & commodum speratum, nisi qui rerum humanarum conditionem ignorat, sibi persuaserit nemo; quod autem aliqua, imo multa spei satisfecerint & votis, in meridiana luce est positum. De cætero tempore opus est, ut salubriter inventa communi usu recipiantur, &

E

con-

convetudine in familiaritatem veniant, obnitente
præsertim vulgo aviti moris tenacissimo. Spargunt
scientiae artium semina, crescentes nutriunt, fru-
etus alii citius proveniunt, alii seculis maturent.

TANTUM.

